

298 Relation de la Nouvelle France,

auoient vne telle rage contre moy, auant ma fuite, quel traitement me feront-ils, me voyant retombé dans leur pouuoir, ie ne mourray point d'vne mort commune: le feu, la rage & les cruautés qu'ils inuentent, m'arracheront la vie, Dieu soit beny pour iamais. Nous sommes incessamment dans le sein de sa diuine & toujours adorable providence, Vostri capilli capitis numerati sunt: nolite timere: multis passeribus meliores estis vos quorum vnus non cadet super terram sine patre vestro. Celuy qui a soin des petits oiseaux de l'air ne nous met pas en oubly, il y a desia douze iours que ie suis caché, il est bien difficile qu'un mauuais iour ne vienne iusques à moy.

En troisieme lieu vous voyez les grands besoins que nous auons de vos prieres, & des saints Sacrifices de vous nos Peres, procurez nous ceste amosne par tout. Vt reddat me Dominus idoneum ad se amandum, fortem ad patiendum, constantem ad perseuerandum in suo amore, & seruitio: afin que Dieu me rende propre, & bié disposé pour l'aimer, qu'il me rende fort & courageux, pour souffrir, & pour endurer, & qu'il me donne vne genereuse constance, pour perseuerer en